

Årsmelding for 2023

Håvard Vederhus og IOP Norges Utdanningsfond

Innleiing

Utdanningsfondet er no inn i sitt ellefte år og vi som sit i styret for fondet sender med dette ut vår sjette årsmelding for å kunne informere om aktiviteten i Utdanningsfondet. Vi synest dette er viktig informasjon å nå ut med til dei som bidrar med midlar til fondet og også til andre som er interessert i informasjon om Utdanningsfondet.

Kort om historia til Utdanningsfondet og om styret

Utdanningsfondet vart oppretta før jul i 2014 til minne om Håvard Vederhus som mista livet på Utøya 22. juli 2011. Utdanningsfondet vart oppretta i samarbeid mellom foreldra til Håvard, Kirsten og Alf, og IOP (Ilula Orphan Program) Norge. Fondet starta med ei gåve frå foreldra til Kirsten, Margrete og Øystein Vesterhus og midlar frå IOP Norge. Deretter er fondet finansiert kvart år med bidrag frå mange gjevarar.

I styret i 2023 var Emilie Wilhelmsen frå IOP Norge, Kirsten Vesterhus og Alf Vederhus.

Første tildeling av støtte var for skuleåret 2015/2016. Frå skuleåret 2016/2017 gjekk vi over til å støtte 6 ungdommar. Dei siste fem åra har vi støtta ti studentar årleg.

IOP Tanzania er ein lokalt basert bistandsorganisasjon som kjempar mot fattigdom, HIV og aids ved å gje fattige og foreldrelause barn støtte til livsopphald og utdanning. IOP har støttegrupper i land som Norge, USA, Nederland, Luxemburg, Italia, Tyskland, Sverige og Danmark. IOP har dei seinare åra utvida aktiviteten til å nå alle aldersgrupper i lokalsamfunnet Ilula og er også engasjert i landbruksdrift.

Håvard var svært opptatt av den frigjerande krafta i utdanning og også av internasjonal solidaritet. Fondet er oppretta til minne om han.

Det er eit stort behov for midlar til utdanning etter vidaregåande skule i Tanzania. Fondet blei oppretta for å møte noko av dette behovet. Det tar sikte på å finansiere minimum treårig yrkesutdanning for elevar som er ferdige med vidaregåande skule.

Aktiviteten i Utdanningsfondet i 2023 – tildeling av midlar

Utdanningsfondet har støtta ni studentar i skuleåret 2022/2023 (ein utsette oppstart) og ti studentar i skuleåret 2023/2024. Dette skuleåret finansierer vi sju jenter og tre gutar. Fire av dei er i økonomiutdanning, to tar utdanning innan medisin, ein i undervisning, ein i sosialarbeid, ein i sosiologi og ein i kjemi.

Når vi seier ja til støtte forpliktar vi oss vanlegvis minst for ein treårsperiode framover. Det betyr at vi bør ha reservar for å kunne dekke ein treårsperiode.

I 2023 er det tildelt i alt kr 169 980 i støtte til utdanning og det er komme inn kr 188 956 i bidrag til Utdanningsfondet. Utgåande saldo på bankkonto til Utdanningsfondet per 31.12.2021 er kr 609 806. Utdanningsfondet har same rekneskapsførar som IOP Norge. IOP Norge har tidlegare dekt kostnad med rekneskapsførar. Frå og med 2023 er også Utdanningsfondet med på å dekke kostnad til rekneskapsførar med eit trekk på 3 % av utbetalte midlar.

Tildeling av støtte skjer ved at IOP Tanzania set opp ei prioritert liste over dei som kan få støtte og styret i Utdanningsfondet tar stilling til kor mange ein kan støtte kvart skuleår. Styret ber også om tilbakerapportering frå IOP Tanzania om resultat for kvart semester og framdrift for dei studentane som får støtte, inkludert sluttrapportering etter avslutta utdanning. Vi ber også om rapport om korleis det går med studentar som har fått støtte tidlegare år.

Vi har no fått rapport om i alt 18 studentar der Utdanningsfondet har finansiert minst tre år med utdanning. Av dei er 10 fra perioden før 2021 og 8 frå 2021 – 2023. Biletet er at det kan vere vanskeleg å få relevant arbeid frå starten av, men at det betrar seg over tid. Av dei 10 første er berre ein utan arbeid og to tar vidareutdanning etter å ha arbeidd nokre år. Av dei 8 frå og med 2021 er to utan arbeid medan seks har arbeid av litt varierende karakter. Vi vil halde fram med å be om nytt om dei vi har støtta etter at dei er ferdige med utdanninga.

IOP Tanzania har eit administrasjonsgebyr på 7 % av tildelt støtte for å ta seg av alt det praktiske med oppfølging av dei ti studentane. Utdanning er ingen garanti for jobb i Tanzania, men det er ein føresetnad for ei betre framtid. Vi har overfor IOP Tanzania lagt vekt på at dei må prioritere motiverte ungdommar som søker utdanning som dei kan få brukt etter fullført utdanning. Vi har også lagt vekt på at IOP Tanzania må følgje med på kva som skjer etter fullført utdanning.

Styret har i 2022 brukt styremøte på nett sidan Kirsten og Alf bur i Oslo og Emilie bur i Trondheim. Mykje av tida i styremøta har gått med til å diskutere oppfølging og kontakt med IOP Tanzania. Vi er takknemlege for at dei gjer det praktiske arbeidet med å følgje opp dei ungdommane som får støtte.

Planar for 2024

Av våre ti studentar reknar vi med at to ferdigstiller utdanning dette året og at åtte held fram med studiar i skuleåret 2024/25. Vi reknar med å halde fram med støtte til ti ungdommar neste skuleår, men vil vurdere å kunne auke talet dersom økonomien i fondet tillet det og rapportering frå IOP Tanzania framleis er tilfredsstillande.

Behovet for utdanning i Tanzania er stort og det vi gjev hjelper nokre få studentar. Likevel er midlane frå Utdanningsfondet heilt avgjerande for dei som får dekt kostnadene med

utdanning. Vi takkar alle som har bidratt ein eller fleire gonger til Utdanningsfondet i 2023 og vi vil halde fram dette arbeidet i Håvards ånd.

Mars 2023

Emilie Wilhelmsen Alf Vederhus Kirsten Vesterhus